

Epistola Dedicatoria.

sunt Doctores, quos foelici mortis Philosophicæ ingenio sophia Iugulat ad vitam: Si mensa parata, ea est, de qua sumitur panis vitæ, & intellectus: Si vinum mistum, illud est, ad cuius delicias Christi Domini sponsa introducit, & quo generosiores animi diuinitus incalescunt, vt alis Angelicæ puritatis, cuius germen cælestis est ille liquor, in sublime euecti, defecationis naturæ miscantur intelligentijs: Si illæ militares Ancillæ, quæ ad arcem accurrunt, sunt omnes scientiæ naturales, quæ tanquam euocandorum Theologiæ foetuum obstetrices, Diuinæ Sapientiæ subseruiunt. **SI QVIS EST PARVVLVS**, inquit Diuina illa Sapientia, **VENIAT AD ME**. Accessit vnus è nostris, & accedens omnes ferè secum in illam sapientiæ arcem intulit scientias. Is est R. P. Ioannes Lalemandet, paruulus quidem, si nomen, & institutum Ordinis nostri in humilitate fundati spectetur; at si foelicissimi animi dotes, eaque mens sublimis, quam tot Diuinæ lucis radijs aspersam in suis scriptis posteritati velut delibandam exhibuit, maximum Catholicæ veritatis incrementum, vir omnium scientiarum par Imperio, cuius tota vita clarissimarum virtutum fulgor fuit, doctrina tonitruum, & in comminuendis, & effringendis erroribus, rebusque ad sua Elementa resoluendis, vis, atque impetus, fulmen. Hic discursus humani metas, & omnes naturæ fines foeliciter transgressus, totumque rerum Theologicarum ambitum complexus, rebus nouis intulit auctoritatem, antiquis pondus, obsoletis nitorem, obscuris lucem, fastiditis gratiam, dubijs fidem, omnibus verò naturam, ordinem, pulchritudinem, vires, maiestatem; non aliã sanè mente, nisi vt nostra **MINIMA Religio**, quibus potest viribus, Diuinæ veritati ancillaretur: Ideoque ad illam Turrim Dauid, è qua mille pendent Clypei omnis armatura fortium, suos ad defensionem Philosophicos clypeos (sic enim suas Disputationes vocat) appendit: Inter quos pretiosioris operæ, & nobilioris elaborationis selegimus, quos Metaphysica, Diuinæ quodammodo consanguinea veritati, scientiarum Regina ad **TVAM CELSITVDINEM** deferret, vt faciliori transitu tanquam de nota sibi manu, accepti, in cælestis Sophiæ armamentarijs, quorum clauis à Deo scientiarum, **TVO Arbitrio** commissæ sunt, reponantur. **TVVM** est **ILLVSTRISSE PRINCEPS** ponere sapientiæ mensam, contemplari è specula comedentes, & bibentes in Castrensi scientiarum conuiuio, consurgere, & arripere clypeum. Omnis sermo Dei ignitus clypeus est sperantibus in se: tota **TVA** vita, concio est, & flammeus Clypeus, cuius defensione protegitur Ecclesia. Vt, dum crinita fontibus hydri Typhione hæretica, tetra aspiratione florentissimas Germaniæ Prouincias efflat, dumque ruentibus vbi que Arcibus, oppidis, vrbibus, Templis, Altaribus, legibus, noua quædam monstra hominum, indicto mortalibus immortalibusque bello coniuratis animis auitam pietatem rident, sanctiones sacras violant, Dei immortalis puluinaria exaugurant, & in sanctiss-